



Un total de 150 nenos/as da Ludoteca Municipal, organizada durante os meses de verán polo Concello de Verín, visitan durante estas semanas as instalacións da Biblioteca Pública de Verín e a exposición 'Querido Balbino: 1961-2011. Cincuenta anos de Memorias dun neno labrego', organizada pola Consellería de Cultura e Turismo coa colaboración da Secretaría Xeral de Política Lingüística, a Dirección Xeral de Desenvolvemento Rural e a Deputación de Pontevedra.

Esta actuación está enmarcada dentro do ciclo de visitas guiadas organizadas pola Biblioteca de Verín ao longo do ano, e que xa permitiu que un total de cincocentos alumnos/as do Colexio Rural Agrupado de Monterrei, CEIP Princesa de España, Colexio María Inmaculada e CEIP O Castiñeiro de Laza coñeceran de primeira man o servizo bibliotecario e funcionamento do mesmo; así como, as diferentes actividades educativas e lúdicas que se programan ao longo do ano. Todas elas destinadas a fomentar o interese pola lectura e cultura nos/as nenos/as do municipio, dinamizar a biblioteca e propiciar a labor de voluntariado entre os/as usuarios/as da mesma.

Por outra banda, devandita visita permite que estes 150 menores, con idades comprendidas entre os 3 e 8 anos, coñezan a mostra 'Querido Balbino: 1961-2011. Cincuenta anos de Memorias dun neno labrego', cunha interpretación adaptada a súa idade. A mesma rende homenaxe tanto a un escritor identificado coa terra como o libro *Memorias dun neno labrego*, o máis lido da historia da literatura galega e tamén o máis traducido a outros idiomas (contabilízanse unha vintena de traducións). 'Querido Balbino' articúlase a partir de dous eixos que guían ao espectador a través dun túnel de vitrinas. Dunha banda, preséntase a traxectoria vital do escritor a partir de fotografías, documentos e correspondencia que serven para marcar diferentes momentos transcendentales da súa biografía. E doutra banda, amósanse documentos e material referidos á traxectoria seguida polo propio libro e o seu protagonista. Neste sentido, a exposición lembra as edicións adaptacións teatrais e audiovisuais inspiradas en *Memorias dun neno labrego*, do que xa se imprimiron máis de 600.000 exemplares, e conta cunha sala onde se proxecta un documental sobre Balbino. Ademais, presenta tamén 10 obras pictóricas de autores galegos, inspiradas no protagonista de *Memorias dun neno labrego*. Os autores que colaboran nesta iniciativa son: Paco Lareo, Chema Pazos, Rofer, Esperanza Lema, Federico Fernández, Xoán Domato, Antón Pulido, Herminda Salgueiro, Siro López e Xaquín Marín.